

Hoofdstembureau: Validez di e listanan di candidatonan

Hoofdstembureau ta informa cu lo tin dos sesion publico accesibel pa tur votado tocante e validez di e listanan di candidato.

E proceso ta inicia dia 1 di november 2024, unda Hoofdstembureau ta reuni den un sesion cu no ta publico pa revisa e lista di candidatonan cu a wordo entrega dia 18 di october 2024 pa sigura cu e lista di candidato ta conforme e ley di Ordenansa Electoral.

Tur partido politico lo keda notifica dia 4 di november 2024 via e-mail tocante e



coreccionnan necesario cu mester haci riba nan lista y tin te cu dia 7 di november 2024 pa haci e coreccionnan necesario.

Despues ta sigui cu e prome

sesion publico di Hoofdstembureau pa oficialmente anuncia e validez di e lista di candidatonan dia 8 di november 2024 pa 10:00 AM.

Den caso cu no tin apelacion den dos dia contra di e deci-

sion aki, Hoofdstembureau lo procede cu lot pa numera e listanan y asigna color (tambe via di lot si ta necesario) den un sesion publico dia 13 di november 2024 pa 10:00 AM.

Si acaso tin apelacion na Corte tocante e validez di e lista di candidatonan, e sesion di numeracion y asignacion di color lo tuma lugar mas tarda dia 21 di november 2024.

Hoofdstembureau ta invita tur votado y interesadonan pa tuma nota di e sesionnan publico cu lo tuma luga na Registro Civil y Censo riba

e fechanan menciona ariba y pa keda pendiente pa e link virtual di e livestream cu lo wordo publica riba nos rednan social.

Pa mas informacion, bishita e website oficial di Consejo Electoral Aruba na cra.w y sigui nan na Facebook y Instagram @consehoelectoralaruba. E plataforma nan lo sirbi como un recurso importante pa votadonan, partidonan politico y publico general, pa keda al dia cu anoncionan, fecha nan y guia relevante pa e eleccion di Aruba.

KIA cu otro proyecto exitoso pa detenidonan



Recientemente, Minister demisionario di Husticia y Asuntonan Social Sr. Rocco Tjon (MEP), a bishita instituto coreccional KIA, den cuadro di e proyecto cu a finalisa, esta "Tur Cos ta Posibel". A manda palabranan di pabien na tur esnan cu a haci esaki posibel, incluyendo fundacionnan manera ARTISA, kende ta un stakeholder sumamente importante, mirando cu e proyecto a enfoca riba e parti di moda y arte, especificamente pa e grupo di hende muhe na KIA.

Manera ta conoci, algun tempo atras a ehecuta e proyecto aki pa hobennan na KIA. Actualmente, a base di e proyecto aki, tin un hoben

na Italia cu for di momento cu el a sali for di KIA, a haya e oportunidad pa participa na un proyecto na Italia, caminda e ta haci trabao boluntario y alabes ta enfoca riba e parti di musica.

Segun un comunicado di gobierno, ultimo temponan a inverti hopi den nos instituto coreccional, especificamente pa loke ta ofrece na detenidonan. Asina a haci entrega di diferente certificado cu ta toca diferente parti, manera welder, entrepreneurship, business, como tambe barberia. Pues lo sigui enfoca riba e tipo di cursonan aki, mirando cu a haci un evaluacion bao di tur nos detenidonan pa asina wak kico ta e nivel di experiencia cu nan tin, pero tambe kico tin nan



interes.

Banda di esaki, na september, Ministerio di Husticia y Asuntonan Social a manda un carta pa Hulanda. Asina por bisa cu e peticion cu a entrega a keda aproba y esaki ta practicamente pa tres proyecto.

Dos proyecto lo enfoca mas riba e parti di e cuido pa e detenido pa di e forma ey por garantisar, no solamente mas educacion y cursonan pa nos detenidonan, pero tambe por brinda nan mas oportunidad di trabao.

Alabes, a yega na otro pa loke ta e proyecto pa yega na un prizon nobo. UNOPS, kende ta e organizacion cu a traha e business case pa Sint Maarten, lo bay traha esun pa Aruba tambe y esaki lo bay wordo aproba. Pues, un paso sumamente importantante pa asina por cuminsa e combersacionnan cu Hulanda, pa asina wak con por yega na financiamento pa un prizon nobo.

Proyecto "Seroe Colorado World War II Memorial" ta conta e papel importante di Aruba durante e guerra

Siman pasa, historiador Dufi Kock a presenta e lansamento di e proyecto "Seroe Colorado World War II Memorial", splicando e importancia di e proyecto contando e historia di e Segunda Guerra Mundial y e papel di Aruba.



Historiador señor Dufi Kock a bisa cu: Riba 16 di februari, 1942, pa 1:31 di marduga, Aruba a wordo ataca pa Alemania durante di Dos Guerra Mundial. Habitantenan di San Nicolas a wordo sacudi den nan soño pa sonidonan di guerra. Trahadornan di e refineria no a bandona pia di trabao y a haci tareanan peligroso durante e dianan cu a sigui pa proteha e refineria y Aruba. Aruba a bira e promer pais den hemisferio occidental cu a wordo ataca pa e regimen Nazi.

Aruba tabata hungando un rol importante pa aliadonan

pa motibo cu refineria Lago tabata e mas grandi di mundo e tempo ey produciendo y entregando e gasolin pa avionnan di aliadonan por a bula y defende Inglatera den e bataya di Gran Britania y gana e Guerra na Europa contra Hitler.

Submarinonan Aleman a ataca tankeronan den waf di Aruba y esnan biniendo for di Venezuela, matando trahadonan di Lago riba e tankeronan Pedernales, Oranjestad, Tia Juana y San Nicolas. Den apenas tres ora y pico, 47 persona a perde nan bida, entre nan 12 Boneriano. E echo cu Capitan

Hartenstein di e submarino Aleman U-156 no a mira e tankero SS Hooiberg cu net na e momento ey tabata biniendo na e mesun sitio pa hancra, a evita cu mas victima a cay. Tambe e submarino U-156 a manda cañon riba e refineria, pero ningun a dal e 3000 tonelada di explosivo riba e waf, sino parti grandi di nos isla lo a wordo afecta, specialmente San Nicolas.

Despues soldanan Americano a yega Aruba pa reemplasa e soldanan Britanico y na Seroe Colorado nan a construi cuatro estructura pa cañon grandi, dos bunker y un spotlight potente, tur esaki pa proteha Lago y Aruba.

Nos semper lo corda e frase di nos heroe di Segunda Guerra Mundial, Boy Ecury: 'Den cas di mi tata, no tin luga pa traidor', ken na un edad hoben di 22 aña a entrega su bida pa no muri como un traidor, pero como un heroe".



ANUNCIO/BLBA/153/24

Di acuerdo cu articulo 3 di "Arbeidsbesluit III" Mediador di Gobierno na Aruba ta anuncia lo siguiente:

a. Siguiendo referendum lo wordo teni bao empleadonan di:

Number di EMPRESA : "Stichting Cas Marie Aruba"

Fecha di referendum : Diaranson 6 di november 2024

Duracion di referendum : 16:30 pm – 17:30 pm

Luga referendum : Bureau Landsbemiddelaar
Dr. Henriquezstraat # 19

b. Na dicho referendum lo participa e sindicadonan:
Arubaanse Bond van Werknemers in Verplegende Instellingen (ABV).

c. Empleadonan cu tin derecho di voto cual ta aparece ariba e lista cu ta bai pa e partidonan dia 31 di oktober 2024.

Aruba, 1 di november 2024
Mediador di Gobierno
Anselmo Pontilius